

四庫全書

集部

欽定四庫全書

集部

新安文獻志卷五十三

四

詳校官中書臣孫銜

侍讀臣孫球覆勘

總校官庶吉士臣倉聖脉

校對官中書臣吳甸華

謄錄監生臣黃佑

欽定四庫全書

新安文獻志卷五十三

明

程敏政撰

律詩五言

題壁

許宣平

隱居三十載築室南山巔靜夜翫明月閒朝飲碧泉樵

人歌龍上谷鳥戲巖前樂矣不知老都忘甲子年

郡志云宣

平歛人景雲中隱於城陽山時負薪入城擔上桂花瓢及曲竹杖醉歸獨吟訪之多不見惟壁有詩云云好事者題之於洛陽同華傳舍間李白見之曰此仙人詩也乃自宣州遊新安累訪不遇題其菴云我吟傳舍詩來

訪真人居煙嶺逶高跡雲林隔太虛窺庭但蕭索倚杖
空躊躇應化遼天鶴歸當千載餘然此作不見太白集
中殆逸詩邪○羅鄂州曰州南數里有岸特高號浣沙
阜隔溪對龍井山望城陽不遠相傳李太白訪許宣平
徘徊岸上甚久以白詩考之嘗稱金華五百灘之勝而
思為新安之游又嘗自洄溪十六渡至黃山湯池下則
吾土山川勝槩頗已寄於逸想其贈許
宣平之詩沈汾述以為傳當不虛也

白雲溪

吳輦

山徑入脩篁深林蔽日光夏雲生嶂遠瀑水引溪長秀
跡逢皆勝清芬坐轉涼遙看玉尊夕歸路醉中忘

晚眺

汪於

杖策倚柴門，泉聲隔岸聞。
夕陽諸嶺出，晴雪萬山分。
靜對豺狼窟，幽觀鹿豕羣。
今宵寒月近，東北掃浮雲。

新秋獨夜寄戴叔倫

方干

遙夜獨不卧，寂寥庭戶中。
河明五陵上，月滿九門東。
萬里親朋散，故園滄海空。
歸懷正南望，此夕起秋風。

送沛縣司馬丞

舉酒一相觀，逢春聊盡歡。
羈遊故交少，遠別後期難。
路，上野，花發雨中，青草寒悠悠。
兩鄉夢小沛，與長安。

早發洞庭

長天接廣澤二氣共含秋舉目無平地何心戀直鉤孤
鐘鳴大岸片月落中流却憶鴟夷子當時此泛舟

送姚合員外赴金州

受詔從華省開旗發帝州野煙新驛曙殘照古山秋樹
勢連巴沒江聲入楚流惟應行化後吟句上雲樓

旅次錢唐

此處似鄉國堪為朝夕吟雲藏吳相廟樹引越山禽潮

落海人散鐘遲秋寺深我來無舊識誰見寂寥心

方虛谷曰

此詩中四句不書題目一吟即知其為錢唐也

省試麥壟多秀色詩

汪極

南陌生岐穗農家樂事多
塍畦交茂綠苗實際清和日
布玲瓏影風翻浩蕩波
來牟知帝力含哺有衢歌

寄披雲峯誠上人

曹汝弼

院高窮木盛野極靜無言險路通巖頂香泉出石根微
風飄磬韻幽鳥啄苔痕常記相留夜秋堂共聽猿

舒公雄曰

汝弼詩體致高遠有
王右丞孟處士之風

贈披雲峯岳長老

禪外掩松林閒眠度歲陰雨侵香篆溢苔長屐痕深水
在銅瓶冷雲歸玉磬沉前山有靈藥時策杖藜尋

方虛谷曰

此詩幽
而有味

黃山湯泉

凌唐佐

一道出遙岑潺湲古到今雪天聲瀉玉月夜影搖金歲
旱施功大民情被澤深浮容與軒帝仙跡可追尋

已酉亂後寄常州使君姪

汪藻

汾水遊仍遠，瑤池宴未歸。
航遷新廟主，矢及近臣塞。
馬窺天塹邊，烽斷日畿回。
回首復成非。

春到花仍笑，時危特自哀。
平城隆準去，瓜步佛狸來。
地下皆冤肉，人間半劫灰。
只今哀淚眼，那得向君開。

方虛谷曰

此詩本老杜亦惟老杜多有此等詩庾信賦哀江南皆知此意

過臨平二首

一別九霄路，風煙長滿衣。
已成身老大，無復世輕肥。
天

濶鳥雙下山寒人獨歸曉來何似雨春水半巖扉
睡起涼生岸鉤簾坐小窗麥風能起柁梅雨不鳴江往
事心長折歸途影自雙依然蒲柳地人老故先降

客懷

朱弁

兵氣常時見客懷何日開形骸病自瘦鬢髮老相催已
負秦庭哭終期漢節回風雷識我意一雨洗氛埃

戰伐

戰伐何年定悲愁是處同黃雲縈晚塞白露下秋空魚

躍深波月鳥啼落葉風誰知渡江夢一夜繞行宮

十七夜對月

病骨怯風露愁懷厭甲兵人居絕域久月向此宵明輪

仄初經漢光分半隱城遲遲不肯下應識異鄉情

元遺山曰

人謂少章此詩似微非古塞外而末章尤為凜絕必有能辨者

春晚五言寄夢得

朱松

美景足可惜殘春尤不堪晚英餘燕蹴熟顆墜鶯含歲
月蓬雙鬢生涯粟一甌惟思對公瑾把酒話江南

夏夜極涼

朱擇

素簡久辭夜清風先戒秋稻深羣蛤吠草暗一螢流舌
在殊無計心空尚有求按圖尋分野楚尾見吾州

尤溪縣

橋外茅茨好相過問酒錢李花今若此白髮自茫然落
日雲千步春風雪一川明朝記來處石澗響濺濺

送祝澤之表兄還鄉

朱熹

首夏何來此清秋却復歸應緣心未快豈是世相違落

日空書館涼風淨客衣功名須努力別淚莫頻揮

對月思故山夜景

沉沉秋夜永涼月滿荆扉露泣凝餘彩川明澄素暉中
林竹樹暎疎星河漢稀此夕情無限故園何日歸

晚步

吳儆

水靜偏明眼山高不受塵晴沙棲白鳥野渡集歸人問
字誰持酒行歌有負薪娟娟孤月影獨覺向人新

弋陽道中

積雨今朝霽東臯晚日紅人家深蔽樹野水闊浮空久
客仍行役青春已過中嶺頭凝望處腸斷白雲東

呂左史每

誦此
詩

題大安壁

朱晞顏

萬里同為客秋悲未易禁萍蓬鄉國夢松竹歲寒心霜
葉青紅亂雲山紫翠深何時錦屏下樽酒話塵襟

煙波閣

小立煙波上江湖興未忘敗梧風舞葉寒菊露滋香目

逐去雲斷愁隨流水長
蓴鱸秋正好飛棹訪滄浪

次韻劉通判岳陽樓見懷

羅願

魚龍掀舞後渺莽記空庭
地帶三苗濶山傳二女靈
客懷光水月詩筆妙丹青
少作揚雄悔惟思草一經

東山小隱自況

程先

小隱東山下翛然遠市廛
聽泉驚水籥掃徑惜苔錢
病骨知將雨憂懷願有年
丘園賁衰老束帛幾戔戔

通山縣寄朱元晦

汪大猷

碧澗環山麓高低滿百家途窮踈騎氣縣古聽蜂衙書
倩雲中鴈歌煩水底蛙陽和不擇地隨分得春花

聞考亭先師之計時黨禁方嚴

程永奇

忽聞推岱岳吾黨更何依欽枕看炊黍登樓送落暉祥
麟傷史筆山鳥怪儒衣此道終難絕他年有是非

屯溪訪故人

主人溪上宅烏几屢曾憑山直西南向田分上下層池

鮮烹錦鯉塘果致青菱此去重陽近遙岑共一登

清化寓居

王炎

委巷何深僻僑居大寂寥古牆行絡石喬木上凌霄賦
就貧難逐詩成隱莫招固窮吾輩事心地且消搖

方壺別墅

汪楚材

面面軒窓好溪山不待招清風脩竹徑細雨綠荷橋地
僻人煙少天恢景象饒襟懷無一事終老樂簞瓢

次韻晚春夾溪閒行

汪晫

出郭知春晚陰陰綠滿川小橋橫艷麗斜柳拂淪連風
急低雙燕林幽噪一鵲酴醾破香藥孤絕殿羣妍

重陽

方岳

古岸維舟夜蕭蕭秋葉丹野煙連竹暗江雨灑燈寒亦
喜重陽健誰知行路難吾親應念我更把菊花看

道中連雨

老屋村春急歸鷁半暝煙斷崖留宿雨野水沒春田昨
夢山須記幽情鳥不傳也知晴更好草木已爭妍

塵蝕貂裘敝吾生奈爾何雷聲春蟄怒山意暮寒多窮
不彈長鋏歸應負短蓑自知機事淺或可共鷗波

寄魯山兄

搖落山城暮行行返照邊亂蟬鳴古柳獨鶴下遙川秋
事無多日寒花又一年故應深夜雨重憶對牀眠

方虛谷曰

秋崖不江西不
晚唐自成一家

雨中見花

趙幾

細雨欽輕塵枝間態度新春疑天雨寶寒怯地鋪裀葉

底含羞女闌邊倚醉人休將脂粉浣一一是天真

悼鶴

乘化歸遼海雙籠一不開墜翎留片雪遺跡印荒苔月
朗憐孤唳琴閒憶共來瘞銘為琢石雞鶩不須猜

藍溪道中

綠窈雨初歇清和日正長乳禽穿薄靄弱蔓上頽牆村
市筍厨美田家麴餌香老翁扶杖出小立看移秧

劉後村云

趙君詩五七言亦宗晚唐然起脫不為句律所縛

晚霽

錢時

斑駁天穿漏驚奔浪疊空山留宿雨碧雲受夕陽紅蠶
麥闕時務鶯花怯老翁乾坤方寸地今古一絲風

白際嶺下即目

汪若楫

白際摩天秀秋光滿蓼汀山呈金字面田畫井文形夜
出螢相照更闌雞可聽杉松柯不改點染四時青

秋晚懷友

程洙

長亭一尊酒猶記別時斟碧草思前夢黃花見此心關

河秋北望天地日西沉遙想山中桂何人月下吟

雨晴

溪雨生流水山晴出白雲花來風逐逐泥遣燕紛紛客
路猶千里春光已一分歸從都下者相遇說新聞

春望

吳錫疇

春事今如此憑高興未關半簾疎雨過一院落花閒草
色迷幽徑禽聲出晚山東風能育物不改鬢毛斑

呂竹坡云

此五言
之佳者

讀史

汪韶

南北幾離合江山一古今
秋風馳卧棘春雨燕巢林
家國興亡夢英雄勝敗心
九疑呼不起愁絕暮雲深

劉後村云

感時傷事
有足悲慨

吳越歸秋晚

吳龍翰

湖海歸來晚園荒菊幾叢
秋山吟骨瘦霜葉醉顏紅
弔影寒溪上懷人落月中
青燈滋味永不用哭途窮

程文靖公

曰式賢詩句老意新如此詩及山色攢心事江流咽世情皆咀之雋永殊非苟作

山家

吳資深

誅茅傍翠微
生理儘豐肥
剡竹引泉入
開池疊石圍
春常生酒甕
塵不上蓑衣
了自無榮辱
從何較是非

金陵鳳凰臺

汪宗臣

龍虎勢稱雄
鳳凰臺望濃
潮翻江漢轉
地扼楚淮衝
平野頻烽火
孤城半桂種
丹楹傍蕭寺
塵屐識高宗

稼穡

稼穡病多雨
蕪菁種待晴
壘空驚燕去
池淨觀鷗明
野

碓鳴秋杵風簷響夜箏山中涼意早蚊蚋已無聲

行都餞歲

孫嵩

挿架餘殘歷挑燈憶故鄉年光蛇赴壑羈旅鴈隨陽禁
闕迎儺鼓隣街祭竈香英雄須自力容易鬢毛蒼

臨安錢武肅廟

吳越歸旗纛風雲助鼓輦錦蒙山樹遍弩射海潮低龍
鳳城葱鬱牛羊墓慘悽古祠存故里秋草廡東西

倦客

倦客江湖返書生畎畝思古來惟即墨世上幾仇池八
表煙霾隔三春草木哀交游消息斷存沒杳難知

和元京兄賦蘋花

孫巖

一春觀物眼紅紫厭繽紛此水浮明玉何人剪白雲惠
風遊漢女吉日禮湘君地僻應無是留花混藻芹

兵後績溪道中

古道緣流水寒郊帶斷煙稀疎踰種麥羞澀女耕田人
事休兵後秋懷落木前小蘇遺翰墨今古一山川

虛谷
云休

兵落木之句非近
人晚進所能到

陳監丞用韻見贈亦和以謝

肅肅東方老依人可計年
名言傾蓋後古意結繩前
君戶仍多轍予琴故一絃
不應昌歎味置在衆肴先

九日呈戴兄

一別三十載而今近
講堂蕭條同甲子
強健又重陽
萸菊數盃酒
煙雲千仞岡
偶然為此夢
寧復次公狂

虛谷
云類

陳后
山

欽定四庫全書

新安文獻志
卷五十三

十三

秋懷

汪炎昶

劇暑逢添閨微涼忽值秋年爭飛鳥疾雲共此生浮多
難仍懷古他鄉獨倚樓可能天下慮政有一身憂

香嚴院

聲確疲幽徑扶持仗瘦筇斷崖何處路細雨隔山鐘猿
竊垂巖果僧樵卧澗松人言深僻處別更有靈蹤

溪村

滕堦

獨步溪村午時時一二家綠波浮錦鴨翠草點黃花釣

石臨溪古連山繞徑斜幽人吟未極西日散平沙

陸君實哀輓

方回

亘古無斯事予今有若人龍綃同把手鮫室共沉身蹈
海言能踐憂天志不伸曾微一坏土魚腹瘞君臣

晚望許墅

太湖晚山雨白鳥去冥冥古塚多無後荒祠或有靈異
峯攙石骨遠樹聳人形兵革已蘇息廢田蒲稗青

初夏二首

近午初微暑侵晨尚薄寒暗窓蠶績響危棟燕泥乾問
價纖絺貴尋盟舊扇完野人言麥熟出郭好同看

茂密踰千樹深幽僅一家新蟬初脫殼稚菊始分桮潤
氣青陰石晴光白濕沙晚涼督園叟添竹引籬瓜

江漲

暑雪西南下愁霖日夜傾高城人避水古廟吏祈晴沙
鳥依庭宿漁船入市行老夫隱几意可但憫吾生

答陳壽翁

曹涇

共此松蘿蔭
震子萍梗身
幾年傳妙句
今日見斯人
拔俗典刑老
藏山文字新
定交如擇主
貞子倘周臣

伍子胥廟

鮑子壽

百世子胥廟
猶存寂寞中
鞭屍生快怨
抉眼死遺忠
故國古今夢
怒濤朝夕風
登臨一長嘯
斜日海門紅

送程君雋學正歸潯陽

程文海

五老催歸客
天寒道路長
殘冬涉易水
幾日到潯陽
學見吾宗盛
身隨聖道昌
未應嗟晚達
松菊近柴桑

道園
虞氏

曰雪樓詩

沖淡悠遠

鳳凰臺

趙象賢

祇有高臺在鳳兮何所之
瑞存吳國志妙是李侯詩
江勢連天閣雲陰過檻遲
徘徊空睇竚安得見來儀

秋行

葉朱

秋晚天風勁寒雲著翠微
松鬚霜後老菜甲雨中肥
雙鷺忽飛下一僧何處歸
野翁無世慮對境更忘機

虛谷批此

詩云
絕妙

憩昭孝菴

朱燾

結得精廬小中涵不盡清竹穿牆罅出草滿瓦溝生閒
鵲有佳意對蟬無殺聲只來閒半日多少道人情

苔溪晚泊

程以南

一笑苔溪上微茫駐日曛鷺沙行个字魚水呬圓紋晚
色三家市秋容幾樹雲行藏知有分莫誦北山文

登曉蓂臺

曉蓂臺子上載酒共躋攀竟日何妨醉看雲終是閒千

絲平岸柳一髮別州山頗亦關鄉念春深未得還

方虛谷曰

斗山筆力勁健
無近人綺靡風

九日攜長兒登譙樓

唐元

火後青山近風前烏帽斜清溪迴晚櫂古木認吾家斷
飲萸空紫禁寒菊未花憑虛雲滿袖一一數歸鴉

節令欺人老親朋鳥散餘獨攜靈壽杖誤讀褚公書木
落秋容出沙寒鴈影初扶持有兒子白髮喜相如

次韻程以文黃山星橋末章屬仲安

今日題橋者燕山耐朔風寄書逢驛使詢路介樵翁村
酒添泉白林曛曬屋紅浮丘不可見笙鶴度崆峒
悠悠俯雲影浩浩吹天風解珮此溪女負苓何處翁焙
出茶芽紫叉來魚眼紅山家慣延客何必羨崆峒

蒼頭初得小犬

稚犬從何得蒼頭買近隣畏寒初離母學吠稍驚人警
盜期猶遠分餐喚易頻因知推艮象併感諫蔡臣

舟中即事

胡初翁

江白元無月山涼總是秋何人許分席中夜尚行舟沙
鳥鳴煙際天河下水頭平生得奇觀大半在滄洲

雷塘

汪稱隱

雷塘千載恨弔古重悽然歌舞神州破巡遊霸業偏愁
雲迷古墓寒月照荒田楊柳隋堤綠年年繫客船

思歸

汪石田

記得秋吟下披蓑坐釣磯竹風敲石磴梅月印柴扉回
首雲千疊歸心電一飛郊墟秋色老江上憶魚肥

題汪古逸詩集後

汪澤民

歛有清吟士篇題古逸民雲沙方自貴珠玉不言貧桂
樹歌招隱桃源亂避秦山川以形勝名姓豈沉淪

西湖春晚

汪莊

四載西湖別三春南浦邊驚歸林色破鳬沒水痕圓坐
潤雲生席迴遲風逆船同遊又同約隔日卜晴天

齊雲巖

度迴復登危依山一徑微洞寒龍正蟄崖暝鵲初歸探

水雲生屐捫蘿露濕衣層巖去天近織女夜鳴機

次韻方叔高

程文

玉堂今夜雪偏照小窓明夢繞三江水愁連百雉城寄
書防未達投筆自憐生分作升堂拜無違同舍盟

回溪道中

客路三尺雪如行瓊田中煙火閤墟落乾坤見清空晃
朗川上日飄蕭林際風南山有猛虎思欲控琯弓

鮑仲安南軒

此詩載黟南集中近世
誤傳為倪尚德之作

遠客冬歸日南軒晚眺時山依黃帝井地接紫陽祠古

剎留唐畫遺阡失晉碑桑籃與金釧先澤少人知

本注云二

物鮑氏先世所藏

山家引泉

呂諒

空巖架脩竹高下勢相連
懶汲門前水遙通屋後泉
蘇痕流石髓山翠入厨煙
飲我塵中客心清若露蟬

紫極宮用劉曉窗韻

蔣師文

塵外逢仙客丹房笑語新
藥靈砂戀母松老茯成人
孤

鶴籠飛羽雙龍偃怒鱗老君元不老亦有鬚如銀

晚立

白鷺飛來急人家水滿塘客懷多潦草春事到農桑風
雨連今夕山川非故鄉牧童吹籜葉音韻亦悠揚

和羅松岡山居韻

我愛山居好楓林紅似花鶴能陪坐客犬不離貧家吟
偕敲冰紙閑分煮雪茶村深民俗古同爨及總麻

次蘭坡弟見寄韻

不是無兄弟君能同急難性無箕釜迫夢入草池寬漸
老猶攜硯相思怕倚闌寄來書一紙反復幾回看

觀潮

汪斌

胥魂鞭海蜃怒氣捲風埃浪滾晴天雪聲轟午夜雷吳
兒爭岸捷商舶駕空來江靜三山暝憑高首屢回

經故郊臺

厭煩尋路僻偶爾入荒村古禮存遺跡園丘儼至尊松
風悲閒寂江月照黃昏餘恨無今古行人欲斷魂

次韻李毓之憲郎

程養全

佳遊白石巖飲馬百花潭道路經蒼莽衣裾濕翠藍雨
餘春水活煙暝暮林慚獨有絃歌化時聞奏雅南

曉渡柏溪策應海東之萬戶 吳訥

睡起東窓白蕭蕭戰馬鳴旌旗開宿霧鼓角送殘更是
處煙塵暗何時宇宙清此行須努力奏凱入山城

泊舟黃鶴樓下與伯京先生別

登高賦鸚鵡不放酒盃停城入漢江黑樓吞荆樹青乾

坤事爭戰南北感漂零去路萬餘里明朝過洞庭

忠勤樓諸老夜直予時守省作詩二章寄之

汪廣洋

西掖延秋爽高樓倚太清玉繩當座轉銀漢近人明上
相思經濟諸公任老成不知前席夜曾語及蒼生
耿耿衆星白漫漫長夜寒萬方猶用武一榻豈容安零
露露琴席高梧下井闌永懷何以託詩罷動猗蘭

送院判俞子茂進兵番易

江東風日晴把酒送君行好慰三千士將收七十城煙
花催疊鼓雲騎擁連營山越人爭喜殊方自此清

送黎蘭谷遊永州

唐書

舟子開帆日天風吹雪時關河歲將晏荊楚客何之水
接三苗國雲迷二女祠經過逢北鴈應有寄來詩

寄方壺道人

海上神仙館天邊處士星卧雲歌酒德對雨注茶經石
洞龍噓氣松巢鶴墜翎都將金玉句一一寫空青

觀輿圖有感五首

趙訪

朝雨茅茨濕披圖嘆禹功山河一掌上宇宙九疇中水
性惟趨下民生本易窮胼胝豈無事大智與天通

四履應難辨三河尚可尋功推城濮雋澤想召陵深問
鼎猶懷惡投龜肯易心向無微管嘆孰憶到于今

轍已還諸夏居猶憶九夷難求伐木處尚想饋豚時夾
谷真成謗中牟不易知惟存刪述事赫赫起周衰

皓首陳王道時君孰可當艱難思稷契容易託齊梁越

豈資冠冕秦方用虎狼空聞歸大老不復見鷹揚

雒邑空南渡東都亦北轅已符前五閨空憶後三元分

合巧相似短長難等倫海東天所祐一統世中原

世謂漢唐

宋為後

三代

和唐宰山行

汪克寬

山縣千峯疊閭閻雜嶮夷雨香魚潑刺風軟燕差池郭
外耕夫耦桑中稚子嬉絃歌聲教遠民俗變澆漓

寄仲觀弟

汪獻

雨作晚天黑，衡茅獨坐時。
雷車隨電發，螢火上窗遲。
虛室寂無我，至言當告誰。
恒陽寒氣早，那得不相思。

過湏陽峽

鄭潛

清絕湏陽峽，秋過客思驚。
風篁疑列戟，煙樹似屯營。
水毒人多瘴，山輝石有英。
峒謠何日息，猶自滯官兵。

連江舟行

蓬窗觀物化，幽興亦無涯。
翠篠抽黃蘗，青林蔓白花。
蝸涎光暗石，蟲蛻聚浮槎。
小憩軒崖瀑，清風試煮茶。

程黟南曰

彦昭詩蓋駸駸乎格
高律熟而入於精者

雪夜讀杜詩

朱模

十年鄉國亂幾卷杜陵詩
閉戶挑燈夜深山積雪時紫

陽誇入蜀雙井喜居夔岐路終何適
吾將有所思

張外史伯

雨云朱子範詩
有虞揭遺響

宿羊舌城

舒蓼皆侯國春秋用甲兵
晚炊投野店日落弔荒城
古渡漁燈滅陰房鬼火明
愁來不成寐欹枕對雞鳴

過太湖

唐桂芳

向晚推蓬看羣山隱約青篙工排蟻勢野飯雜魚腥水
閣疑無地天低剩見星吳音相爾汝聊復慰飄零

送楊曾之浙東

佳麗金陵地蕭然爾獨居門無私客謁座有諫官書清
切登臺久光華入幙初浙東勞遠役民瘼問何如

題景德鎮東山寺

程彌壽

招提在何許緩步更高登行盡石頭路適逢林下僧巖

泉飛瀑布寶剎聳觚稜掃壁題詩處重遊記昔曾

懷趙四知已

任原

久客滯南閩招尋賴故人孤琴清水月一劍舊風塵樹
色愁看暮鶯聲醉度春清音亭下路看竹莫辭貧

虹

舒頔

蟬竦東方見光分五彩殊彎弓射地軸懸玦示寰區變
見陰陽理昭回山水隅環天萬丈勢收歛在須臾

秋日

吳舜舉

覽物悲搖落傷時厭亂離二毛潘岳賦三峽杜陵詩壁
潤蝸行字窗晴蟾吐絲物情還自適人事苦難期

夜坐

歲月來無限詩書妙不傳徒勞充棟宇已是昧跡筌歷
歷千年上悠悠百聖前青燈最知我相對兩悠然

晚步

程用晦

晚來絃誦輟櫓杖步村墟川水從橫出人家高下居草
生侵徑狹葉發補林疎不覺歸途暝行天月一梳

春園

鶯聲如喚客散策步林隈感物知春意題詩試老才土
萌鞭筍出石觸樹根回籍地坐來久襟裳濕翠苔

暈陽書院

梅州同知績溪程燧所立燧台州
錄判相之子宋丞相元鳳從曾孫

余舜欽

猶憶升平日頻來錄判村竹林連古巷文字見諸孫壯
觀三槐業清幽獨樂園悽然遭喪亂相對兩忘言

次韻方希直教授二首

鄭諒

闕下知名久相逢
值暮春
才華曾動主
議論每過人
漢水元通蜀
台山亦近閩
何時江海上
尊酒話西秦
為問天台客
何時別草堂
千巖空劍氣
萬卷有虹光
為政慚吾拙
擣辭屬子良
方思歌伐木
深負詠甘棠

秋日書懷

胡安

江海投荒久
山林引興長
題詩楓葉下
把酒菊花香
嵐翠山霑雨
林紅葉受霜
塵纓須一濯
無處覓滄浪

晚步

唐和

欽定四庫全書

新安文獻志
卷五十三

二十六

晚步東郊外平林日已收
豆苗和草綠芋葉壅泥稠
牧子爭歸路田翁不裹頭
但言夫事急邊報幾時休

魯港

唐文鳳

魯港停舟處相逢故老談
河魚時潑刺江燕又呢喃
帶雨張帆腹臨風拂劍鐔
百年董狐筆憤死木綿菴

送祭酒李先生致仕歸安成二首

楊寧

白髮老司成精忠當代名
一朝謝官去六館清風生
諸

士懷宿德斯文仰耆英東門不得送悵望有餘情
祭酒辭榮祿諸生為乞恩人心古難結師道今逾尊德
愛不可泯文名寧獨存清風高萬古能使薄夫敦

酬蘇景元

汪敬

遠市幽棲處高閒寄野情雨苔粘屐齒風竹亂書聲鳥
逐雲歸樹花迎日上楹知君愛靜逸心已薄浮名

江樓晚眺懷姑蘇朱孝常

蘇景元

殊鄉嘆行役登覽亦淒其落日家千里故人天一涯渚

煙漁父艇江樹水神祠遠道交游少憑誰寄所思

春日富春山中

鳥啼煙樹春風暖墮遊塵割蜜蜂隨甕移花蝶趁人間
邀隣叟話坐愛野苔新山蕨鮮堪煮吟餘自拾薪

嚴州晚泊

汪蔭

東館維舟日微風浪乍生渚雲低斷岸煙柳暗孤城
僕酤村酒舟人話水程故鄉飛鳥外翹首不勝情

題吳思顯靜齋

孫陽

世路多喧雜書齋靜處安半窗松影淨一徑菊花寒
把筆聞啼鳥看山獨倚闌寸心無外慕何處恐驚湍

欽定四庫全書

新安文獻志
卷五十三

新安文獻志卷五十三

欽定四庫全書

新安文獻志卷五十四

明 程敏政 撰

律詩七言

題睦州郡中千峯榭

方干

豈知平地似天台
朱戶深沉別徑開
曳響露蟬穿樹去
斜行沙鳥向池來
窗中早月當琴榻
牆上秋山入酒杯
何事此中如世外
應緣羊祜是仙才

唐音注雄飛詩有
警句孫洽稱之云

其秀也仙榮於常華
其鳴也靈龜於衆響

贈錢塘湖上唐處士

我愛君家似洞庭，衝灣潑岸夜濤聲。
蟾蜍影裏清吟苦，舴艋舟中白髮生。
常共酒杯為伴侶，復聞紗帽見公卿。
莫言舉世無知己，自有孤雲識此情。

楊亭言事

重疊山前對酒樽，騰騰兀兀度朝昏。
平明踈磬白雲寺，遙夜孤砧紅葉村。
去鳥豈知煙樹遠，驚魚應覺露荷翻。
旅人寄食逢黃菊，每見北辰思故園。

環溪亭為睦州守呂郎中賦

為是仙才登望處風光便似武陵春
閒花半落猶迷蝶白鳥雙飛不避人
樹影興餘侵枕簟荷香坐久著衣巾
暫來此地非多日明主那容借寇恂

答楊劉二內翰見寄之作

舒雅

清貴無過近侍臣多情猶憶舊交親
金蓮燭下裁詩句麟角峯前寄隱淪
和氣忽飄燕谷暖好風隨起謝庭春
緘藏便是山家寶留與兒孫世不貧

楊大年詩云綠髮郎潛不記年却尋

欽定四庫全書

卷五十四

丹竈味靈篇華陰學霧還成市彭澤橫琴豈要絃晚紫
祇因食沆瀣夜灘誰見弄潺湲須知吏隱金門客待乞
刀圭作地仙劉子儀詩云石渠仙署久離羣抗跡丹臺
世絕倫揚子不甘嘲尚白漆園終許自全真紫煙深處
驚雙舞朱髓成來鳥共伸若向雲中見雞犬可能渾忘
姓劉人○按宋史舒雅恬於榮宦因舒州靈仙觀有勝
跡請以職方員外掌觀事優
游山水吟詠自樂時人美之

寄任從事

曹汝弼

才名宦況與誰傳士庶爭誇繼昔賢詩就楚蘭歌白雪
幕從賓府入紅蓮雲奇遣吏開山閣茶好留僧煮石泉
宴罷沙堤步苔蘚小園輕氎似真仙

寄茅山友人

丘濬

鳴鳳相邀覽德輝松蘿從此與心違
孤峯萬仞月正照古屋數間人未歸
欲助唐虞開有道深慚巢許勸忘機
明朝又引輕帆去紫朮年年空自肥

送虔州通判周茂叔對移永州

程師孟

移官遠過耒陽西好景重重合盡題
永水自然勝贛水浯溪應不讓瀛溪
沙頭候吏瞻旗脚境上鄉人待馬蹄

曾是忠賢流落處至今蘭芷尚萋萋

秦少游題郡中蓬萊閣次其韻

半天鐘鼓宴崢嶸早晚陰晴景旋生湖暖水香春載酒
月寒雲白夜聞笙金鼇破海頭爭出玉鷺排煙陣自橫
我是蓬萊東道主倚欄長占日初明

寄謝無逸

汪革

問訊江南謝康樂溪堂春木想扶疎高談何日看揮麈
安步從來可當車但得丹霞訪龐老何須狗監薦相如

新年更勵於陵操妻子同鋤五畝蔬

見紫薇詩話

次韻向君受感秋二首

汪藻

且欲相隨首藉盤不須多問沐猴冠菊花有意浮盃酒
桐葉無聲下井欄千里江山漁笛晚十年燈火客羶寒
男兒幾許功名事華髮催人不少寬

胡荅溪云彥章此詩漁笛客羶一聯

山谷體也

向侯拄笏意千里肯為俗彈頭上冠何日盛之青瑣闥
妙語付以烏絲欄日邊人去鴈行斷江上秋高楓葉寒

欽定四庫全書

卷五十四

向來叔度倘公是一見使我窮愁寬

方虛谷曰自山谷續老杜之脉凡江

西派皆得為此奇調汪彥章與呂居仁同輩行悉得傳授自後始盛行晚唐而高致絕焉

止戈堂為閩帥顯謨程公賦

千里閩山驛騎飛天書趣解海邊圍異軍方逐蒼頭起

元帥徐將白羽揮翻就鏡歌春舉酒收還烽火夜開扉

向來萬事闢兵氣都作風光坐上歸

桐江詩話云程進道紹興初帥閩中

殄滅諸寇以武庫為止戈堂一時諸公題詠甚多彥章此詩最為絕唱

醉別李高侍郎

疇昔追隨翰墨場功名今日愧劉郎
英姿合上凌煙閣巧譖曾遭偃月堂
雙槩又承清夜去一尊聊發少年狂
歸來却共燈花語騎省看成滿鏡霜

用韻招許主簿

程俱

風騷無復見黃初尚想應劉載後車
病骨不知緣底瘦愁眉時得為君舒
動人春色來隨燕入眼溪流靜見魚
祇有此中多好句可來茅閣試憑虛

次韻鄭大夫半隱亭

欽定四庫全書

新考文獻
卷五十四

脫屣歸來稅兩轡信知塵世有蕭閒幽亭似近郎官谷
捷徑知非少室山歲月優游真得計風埃顛顚獨何顏
園林日涉仍多趣坐看雲飛鳥倦還

張敏叔得請謝事欽仰高躅謹成口號

富貴紛紛有底難乘時如探索中凡高人不啻曇華見
晚節誰為趙璧完且喜芝蘭俱秀發不嫌松桂愈清寒
他年側席思耆舊矍鑠猶能一據鞍

題雲館二星集後

李任道編錄濟陽公文章與
僕鄙製合為一集且以雲館

二星名之僕何人也乃使與公抗衡獨不慮公
是非者紛紜於異日乎因作詩題於集後俾知
吾心者不吾過也庚申
六月丙辰江東朱弁書

朱弁

絕域山川飽所經客蓬歲晚任飄零詞源未得窺三峽
使節何容比二星蘿薦施松慚弱質蒹葭倚玉怪殊形
齊名李杜吾安敢千載公言有汗青

元遺山曰濟陽公
謂宇文叔通叔通

受官而少章以死自守恥用叔通見比故此詩以不敢
齊名自託至於書年為庚申與稱江東朱弁者蓋亦有
深意

云

贈范直夫

朱松

將軍競病詩成處南浦春歸蘭玉叢漸減心情身老大
久乖談笑路西東鄉關落日蒼茫外尊酒寒花寂歷中

且與寓公同放曠浩歌相屬倚秋風

朱文公曰先公之喪奉遷于武夷寂

歷山中峯僧舍之北蓋公之詩嘗有尊酒寒花寂歷中之句嗚呼此豈其識耶

九日與客語慨然有廬山之興

朱擇

九日黃花笑白頭分將牢落付林丘半川暝色聊償夢

別嶺秋聲旋寄愁江國經年成浪語匡廬入手是真休
未能免俗須登陟睨視元龍百尺樓

三山次潘靜之升書記韻

客路那知歲月長掀髯一笑蕊芻房且傾徐邈聖賢酒
不問陳登上下林雲影翻空迷海嶠秋聲隨夢到江鄉

明朝各聽船窗雨猶憶枯菰戰寺廊

方虛谷曰連年詩格高峭惜乎不多

送正字胡丈

紹興九年應辰自正字與外任同舍載酒郊外留題壁間且分韻賦

詩為別自後禁網寢密無敢以詩送行者今二十有二年應辰以流落之餘再入冊府而正字

胡丈得請歸建安於是同
舍始復用故事分韻賦詩

汪應辰

先生高臥武夷巔一旦趨朝豈偶然
報國自期如皎日歸田曾不待來年
懷鉛共嘆揚雄老鞭馬今輸祖逖先
冊府風流久寥落送行今復有詩篇

題樂天居士詩集後時謫居廬山

汪大猷

居士當年謫九江高懷往往寓篇章
多言世上風波惡不似閒中氣味長
千載聲名雖莫及一時蹤跡偶相望

若容俗駕追遺矩待看南山結草堂

引年得請和答致政陳昭遠學士

朱熹

一氣無私物自槃放臣偏荷主恩寬方慚妄竊老夫號
詎敢重簪博士冠身退未妨閒養病年豐何幸暫偷安
新篇似許參同社願刺仙舟上釣灘

自注云賈生鵬賦
大釣播物史記作

大專槃物索隱云專讀
作鈞槃猶轉也與播同

闌干首宿久空槃未覺清羸帶眼寬老去光華姦黨籍

向來羞辱侍臣冠極知此道無終古且喜閒身得暫安

漢祚中天那可料明年太歲又泥灘

自注云建隆庚申距今已未二百四

十年矣嘗記年十歲時先君慨然顧語熹曰太祖受命至今百八十年矣嘆息久之銘佩先訓於今甲子又復一周而衰病零落無以少塞臣子之責因和此詩并記其語以示兒輩為之盡然感涕云

和劉叔通懷游子蒙韻

扣角聽君悲復悲壯心未已欲何之交游半落丘山外
離別偏傷老大時尚喜淵潛容賈誼不須日飲教衰絲
病餘我更無憊賴勉與同懷一賦詩

自注云予素不能作唐律和韻尤非

所長年來追逐殊覺牽強子服乃令更為手寫此三詩者不知欲以何用晨起書罷欲記歲月方覺是庚申開基節日此亦難達之會感嘆久之

送邕州吳使君

羅願

題輿纔赴日邊程便擁油幢鎮列城地望素高唐五管人才今似漢三明時清市駿非無意歲晏逢花好寄聲太學英名湖海氣此行持論要平平

次韻楚覺先見贈

奏事何能補帝聰流年早已付天公舊聞雙劍淪波底

忽有三刀入夢中
首出詩文為我賀
多慚憂樂與人同
如君孝友天應報
飛鶴那應久在籠

送楊文父還醴陵

程洵

君家江西我江東
相望雖遠聲氣同
一行作吏湖湘上
數面深交談笑中
君思松竹行色動
我困簿領蜚塵蒙
他時登高倘有賦
莫忘江頭回鴈峯

過分水嶺

相與振衣千仞岡
浩歌莫惜且徜徉
風來閩徼不知遠

山接吳天如許長
裘敝且將雲作氎
囊羞猶可墨為莊
眼明更向西南望
依約家林傍夕陽

懷朱晦菴先生

汪莘

道在羲皇孰斷金
至人出處合天心
青山白雲有生路
流水落花無足音
世外太古日色靜
洞中一片春風深
自憐晚輩服膺久
亦許杖屨來相尋

閒居書懷

程先

灰却丹心剖棘藩
市居寧覺市聲喧
夢中幽趣官槐國

塵外高蹤吏漆園懶取硯山供秘玩且封文塚奠陳言
尋常恰類君平肆問卜時時有過門

和費樞密登卞忠貞公墓

程秘

底用荒村訪野墳青編相對儼如存當年但識清談樂
今日方知節槩尊千載腐儒空弔古幾章冷語自銷魂
便當慘力清河洛一洗新亭舊淚痕

遊翠眉用蘇黃門舊韻

先塋在焉

汪暉

黛拂蛾眉兩月彎虛亭著與小三間吾翁先見如樗里

此老遺思比峴山千仞遠峯和我瘦一庭芳草伴春閒

登臨涕落當年事不見仙人玉雪顏

元張公純仁云康
範詩典雅和平無

晚宋
氣習

和岳王廟壁上韻

祁閭西一舍有菴曰東松紹
興初岳鄂王提兵經吾郡西

上士卒秋毫無犯夜宿人門外足
不敢一越限內嘗總是菴畱題

呂午

當年惟說岳家軍紀律森嚴孰與隣師過家家皆按堵
功成處處可錫珉威名千古更無敵詞翰數行俱絕塵

擬取中原報明主亦勞餘刃到黃巾

陪吳總侍集硯山用趙端明送行韻

方岳

煙波畫出暮江天著我蘆花明月船
官滿只稱前進士路貧休問小行年
一歸已後陶元亮衆論寧無班孟堅
不負登臨重九約過江猶及菊花前

正月二十二夜迅雷大雨牛菴一巨松有物拏
攫而上自本至末爪痕宛然

蟄龍怒欲起春霆併挾虬髯上杳冥老色干雲鱗甲動
蒼皮枯電爪痕腥物方神變誰能測山不高深亦有靈
誰與護持詩墨在畧無風雨損吾亭

次韻武侯廟

汪應晦

武侯遺廟自丹青霸業銷磨但故城北魏中分盟血在
南陽三顧夙心明君臣際會宜興漢吳蜀相資失借荆
獨致辭香思祀典西山回首暮雲生

次韻朱塘

自序云淳祐二年春王正月丁巳許
月卿過滕二子曰子嘗遊朱塘乎曰

欽定四庫全書

卷五十四

未也曰淳熙之三年朱文公歸故鄉遊朱塘山
深水靜荷花其間慨然曰是吾夢遊所也此誰
之土於是先大夫拱而進曰先業也先塚在此
文公曰是宜為亭以領山水子取幅紙吾為若
書以告同志者共成之先大夫雅謹畏時又少
四顧無楮筆則已異時為鉉鈞言常以為恨試
與子遊乎遂如朱塘歸相與為詩秋八月亭成
郡丞秘書郎書其扁曰晦翁亭滕子以詩來有
留之者冬十月詩
成月卿用韻亦賦

許月卿

遊子從來悲故鄉歸來襟袖正蘭芳夢魂飛去雲濤遠
杖策閒行秋水光可是月中曾到此安知身後却餘香
紫陽弟子多賢子卜築新亭是肯堂

宣城倅館

吳山

一年荒宿敬亭嵐世路如今亦頗諳
鴉帶夕陽來舍北鴈傳秋信到江南
王曾素志非溫飽毛義微名為旨甘
料得倚門凝望切東風何日擁歸驂

春日

吳錫疇

韶光大半去匆匆幾許幽情遞不通
燕未成家寒食雨人如中酒落花風
一窗草逆濂溪老五畝園私涑水翁
無賦招魂難獨笑且排春句答春工

予嘗於何人卷中見左史公稱說著

梅花定說君之句不知其竹洲後人也意王愷之珊瑚
扶踈二尺美止此矣比吳君過予崖下出其寶則三四
尺六七株如燕未成家寒食雨人如中酒落花風者尚
多也子其秘之毋使豆粥韭齏為帳下兒所賣彼愷輩
那得與君爭長寶祐甲寅
十月既望秋崖方岳拜手

對燈詠感

矜竈瘦影伴孤燈兩鬢蕭然失舊青豪在尚堪論劍術
骨凡何用泥丹經半生蹤跡如春燕少日交游類曙星
閒拂桐絲寫幽意洋洋不為有人聽

遣懷雜賦

孫嵩

宇宙迂疎一布衣謀身畢竟是邪非能知道義丘山重
定看榮華草芥微世事悠悠蝴蝶夢人情擾擾桔槔機
英雄不是違流俗白雪陽春和自稀

春日武康遊望過孟東野故居

殘靄初收半在沙一川芳草趁溪斜羣峯古意茫茫國
廢地詩情正曜家天末淒迷浮野色柳邊駘蕩受春華
更攜尊酒看脩竹不為前坡得意花

慙嘆

欽定四庫全書

卷五十四

救地扶天力不支，猶為落落怪男兒。
泥中龍逝江神駭，波際鯨枯海若悲。
恨入煙雲連漢縣，魂隨霜雪薄燕垂。
可憐傲兀南冠在，吟盡關山慟絕詩。

金庭觀王右軍祠

孫巖

罷郡歸來三畝宅，化為琳宇入層雲。
樓亡莫辨藏書地，池在如親洗墨人。
特援憂勤規太傅，不將恢復許中軍。
世間何物無澌盡，英槩千秋萬古新。

出越城舟行乙夜紆道以避過兵

擾擾紅巾起草間，舊遊何地不凋殘。
歸囊薄有桃花米，行路如經竹節灘。
戰馬東來橫殺氣，扁舟北去解憂端。
曲肱便結須臾夢，柳暗黟川把釣竿。

方虛谷曰：長孫君嵩元京詩清勁苦。

淡如其為人。小孫君巖次皋予未之識。忽袖詩訪于武林，亦清勁苦淡如其兄。

南山

汪炎祖

宣平隱處今始過，煙霞城郭路幾何。
野渡誰浮夕陽艇，空山尚響樵人歌。
石壇荒涼疊苔蘚，谷鳥啁晰深松蘿。
何當更值買酒至，一笑使我朱顏酡。

冬至

草草歡娛共一觴
葭灰昨夜照初陽
民貧絕喜冬猶暖
客倦翻嫌日漸長
造化不停聊闔閭
人情自此隔炎涼
欲占歲稔渾無雪
兒詫晴雲曉色黃

聞笛

荒村犬吠人猶行
驚鳥亂啼山月明
南隣擣礧適復罷
何處吹笛秋更清
疑含白龍堆外怨
恨不黃鶴樓中聽
螢飛露下百草濕
倚風激烈思平生

趙東山曰古逸先生詩微婉適勁亦

時出於悲
壯激烈

讀四明尊堯集

方回

大道行天如日月羣兒簸弄竟何如
自悲責沈曾為學
安得尊堯更有書
義膽輪囷千古在
神州攻戰百年餘
誣辭逆像今俱已
猶恐忠賢恨未祛

重遊鳳凰臺

重扶瘦影上荒臺
萬里秋陰凝不開
天地未休貔虎戰
江山敢望鳳凰來
是非易判元嘉事
今古難逢太白才

尊酒闌珊詩思亂夕陽吹角不勝哀

溪閣呈陸太初

臨水看山日百迴等閒收拾有詩才
老松於我幾年長啼鳥無名何處來
病髮漸應彫翠葆哀蹤那復夢金臺
鷓鴣未散猶堪典聊挽秋花薦酒杯

贈郭澹溪

赫日燒空暍欲死詩來如向雪中看
古壘出土銅聲盡明月浮空貝影寒
江海豈無鷗作社頭顱安得鷗為冠

會須棄置人間事同向秋風覓釣竿

初夏書事

平生萬事鳥飛空綠鬢蒼顏俛仰中醉若山顏無舊侶
坐如泥塑有新功詩成不覺窗移日心定何煩扇引風

結網小蛛恣來往忘機應亦識衰翁

賢良阮公秀
實亟取此詩

次韻休寧程君園來訪

君先公伯祥秋崖先生
之至交也乙卯冬同飲

於秋崖
夜至曉

秋崖勁筆敵黃陳
贄卷當年許望塵
十載江湖春鴈斷

萬山煙雨石羊新餘生敢忘尊前話先正曾同席上賓
今日相逢兩家子可無努力繼前人

賦歸

汪夢斗

身到嬴秦古塞垣茫茫禹跡故皆存近來粵客通南貨
舊日燕人祭北門治極漢唐猶駁雜功侔禹稷有根源
紀綱法度予何是歸醉牀頭老瓦盆

贄王僉事可與自號濯纓亭主

曹涇

行行六馬轡如濡襟佩雲從得範模天下同知宗孔氏
江東今復見夷吾無邊秋色吟肩瘦有脚春陽道味腴
眼底新安至清水不知聊可濯纓無

平山

鮑子壽

平岡橫亘北城頭一上青冥目數州吳岫南從京口出
蜀江東赴海門流香銷后土花如夢煙鎖雷塘草亦愁
惟有依然淮泗水年年吹浪到瓜洲

松聲

千丈森森礫硤生風來巖壑韻琮琤耳根一洗俗塵淨
木末時聞天籟鳴洶洶銀濤朝拍岸蕭蕭鐵馬夜還營
山中宰相殷勤聽說與傍人笑絕纓

方虛谷曰子壽學有淵源詩亦枯淡

瘦勁

夏日綠繞堂小酌

程一夔

解組歸來得自如畫長人靜草堂虛壺中有酒且留客
囊裏無金不賣書林徑草深稀過馬荷池水響乍跳魚
妨賢尸祿吾何敢一任侯門笑索居

送王景開長官

程文海

楊柳陰陰燕子春東風萬里動遊塵還將碧澗紅泉夢
又送青原白鷺人子在有才須遠器吾哀無計乞閒身
南歸若見沙鷗伴莫道遲迴忘卜隣

吳山感興一

汪雲龍

江湖清濁自天開鴻鴈鳬鷺與往來黃道星辰環太乙
紫雲宮殿隱蓬萊瓊臺漸起纖兒嘆玉笋初經阿母猜
九域圖書今一統百年耆舊獨餘哀

二

山回禁禦入雲長無復陳兵翼兩廂
千石金鐘埋古道
萬年珠樹落秋霜
龍文又徙陽人聚
鳥篆誰堪軹道傍
百郡煙塵渾漠漠
一江波浪自茫茫

三

化人宮室被層阿
碧瓦高低若湧波
翠石文章書日月
寶珠光燄燭山河
天花墜地黃龍現
貝葉翻經白馬馱
誰謂一無超衆有
只今塵土重來過

郊飲

查儀韶

榴已著花紅欲然酒餘休更讀
騷篇繇書契後翻多事
涉患難來非少年天滿四簷空
翠外詩生兩岸嫩涼邊
小風吹盡闌干雨留得斜陽在
釣船

答胡敬存

相望荒煙竹樹村無由觴詠寄
微醺天應只共古今月
人自難同上下雲曉色又隨香
樹遠秋聲偏怯旅窗聞
老來欲述農桑譜留與蘭臺志
藝文

題吳氏雙清道院雲山樓次韻

程榮秀

幾疊雲山護小樓，四圍芳樹碧煙浮。
遠峯當戶偏宜雨，高木臨風獨耐秋。
華表有時歸白鶴，函關拂曉度青牛。
從龍自有諸公在，晦跡何妨老一丘。

題富山汪王廟

胡炳文

虬髯人出鹿歸唐，多少英雄失故鄉。
昔日六州曾捲土，此邦千載尚尊王。
高陵夜雨鳴弓劍，原廟春風潔豆觴。

燈火萬家元夕後誰憐狐兔滿連昌

落梅

程端禮

臘後寒花始覺稠又驚香玉曉來收
飛飛苦恨東風急片片愁隨野水流
有客開尊移別樹何人吹笛在高樓
方當桃李爭妍日宜爾孤芳不肯留

聽鄒雲樵鼓琴

王儀

鄒子相逢鬢已絲援琴為我蕩幽思
一源獨用神嘗王萬籟俱鳴手不知
水合忽將輕騎渡天虛直共羽人期

盡除智巧靈機發燭斷清寒坐轉危

清明日病起不能出漸喜勿藥

唐元

尚憶兒時矜節物插花臨水弄扁舟題詩多愛白塔寺
把酒還尋芳草洲零落舊交時鳥散蹉跎急景大江流
年過四十愁兼病始悟人生萬事浮

送汪謙父教諭長洲

千里遊吳今又歸山中春近蕨芽肥侯芭最擅諸生業

萊子空懸五色衣
擣玉冰溪聊待賈
追風天馬可容躡
曾邀弄楫荷雲浦
不待清秋鴈影飛

天平山

天平山裏唐朝寺
蘋藻重來薦范公
夾道松陰常帶暝
傍巖池影祇函空
石排甲士雲千竈
藤走文蛇地百弓
心與義田同不死
年年襪綰舞秋風

秋日山居自厚堂和韻

胡初翁

小廬高結翠微邊
面面晴嵐一灑然
鷗社相忘聊永日

鶴田雖少亦豐年推窗對竹何由俗繞屋栽桃不為仙
千古淵明是知己眼中風物可斜川

題雪景

奇絕楊家老契丹解將白入草玄間蹇驢退步迷橫約
野鶴尋巢誤別山倚杖地連天共遠呼舟吾與汝俱還
故林祇在江雲北手拂生綃一解顏

論詩次戴庭芳韻

大雅荆榛久見侵黍離既降可傷心戲拈花草工何益

力探根源意自深
春水綠肥分衆派
秋風黃落表高林
何時話到忘言處
坐聽霜空猿嘯音

平山堂

汪稱隱

西去休城十里餘
肯堂新構故人居
門扉曉白天平入
屏障雲橫畫不如
日落秋風生几杖
雨晴空翠濕琴書
何須更說維揚勝
大好溪山照屋廬

舟次嘉禾

洪焱祖

昨宵雨急爭過堰
今日風顛俱泊船
前途難料每若此

遊子相顧空淒然挽弓翻勝一丁字佩印何如二頃田
笠澤鱸魚洞庭橘誰家酒樓新挿天

春晴行園

新歲以來晴旦稀鵲聲忽報金烏飛煙光染深草色紺
雪水融入花根肥懸弧在昔端有志抱甕如今甘息機
多情蜂蝶想自得先我到此遊芳菲

禹穴

汪石田

司馬子長尋禹穴荒苔長闕越山腰龍蛇萬里連滄海

鸞鳳千年下赤霄雲珮日珪文字古白銀青玉鬼神遙
悠悠德業江河外蘋藻臨風恨寂寥

客居

客子江皋草木長蘄離荒徑入牛羊沙頭戍鼓纏秋色
樓外征帆送夕陽勝日襟懷愁自撥故園親友病誰強
南州城下山騰笑多見餘生似漫郎

閒居

汪澤民

門外溪山到亦慵窗前隙壤步苔封中藏花草春環堵

仰視雲霄碧九重
今雨不來從止酒
古心誰會獨支筇
平泉木石知何處
踏雪飛鴻暫寄蹤

次楊掾韻

程文

地爐火冷夜深深
風雪殘燈伴苦吟
歲似蝸蛇遮更速
事如蕉鹿杳難尋
百年塵世須開口
一酌貪泉可易心
珍重關西楊伯起
名成不受二毛侵

簡秋碧孔林管勾

莫怪微官寄豆籩
聖人宮廟喜周旋
長林樹影風煙合

壞壁書光日月懸
文物一時推掌故
世家千載重儒先
殷勤好看壇前杏
坐對春風理素絃

將赴旌德先寄劉明府粹中

花落花開春已秋
感時傷事自多愁
蜃嘘海市浮人馬
鵲架河橋度女牛
湘水使還雲作伴
石渠人老雪盈頭
稍聞許邵持時論
却喜虞卿老故丘

與蜀阜僧立同遊鑑湖

盤石為堤護短籬
畫船深鎖少人知
垂楊著水青青發

遠樹迎人旋旋移滿野農耕春事急隔林僧語日光遲
晚風忽捲殘雲盡四面湖山翠掃眉

自述

方伯鑑

抱琴聊復問田廬野性偏宜水竹居茅屋春風三尺雪
少年心事五車書故家簪笏嗟猶在用世文章愧不如
擬向清秋尋舊約海天空闊鴈行疎

吳氏春雨亭

吳長者寧之墓歛鳳凰山虞伯生
學士作銘達兼善尚書篆額其子

季實復作亭于墓
之側以展孝思

周原誠

蕭蕭餘韻亭前樹灑灑芳原溪上村
虛憶漢庭推長者
難憑楚客賦招魂忠臣巨筆蛟龍奮
太史文章虎豹蹲
孝子此心渾未已
百花香處濺啼痕

輓余廷心元帥

呂諒

百戰殘民力已疲將軍未遣壯心違
城依楚水無兵援
目斷燕山有鴈飛但願斫頭成大節
焉能屈膝解重圍
睢陽死後舒州繼
況是中原大布衣

上巳病目寄葉伯謙汪子敬

程漢

欽定四庫全書

新定文獻志
卷五十四

二十六

病目昏花坐不禁他鄉節序倦招尋
吾伊讀處聲相接爾汝談邊意已深
每覺文章真小技情知道德負初心
洛濱稌飲遺風在何處登臨費百金

梅崖吳先生寄詩次韻

蔣師文

截蒲未肯效溫舒生意相關草不除
鏡裏雪霜難諱老酒邊風月豈仇予
每因母病占義卦不為家貧典漢書
自笑平生談性命一圖猶未究潛虛

和可堂余先生池樓詩韻

浮生莫說四并難興入林泉萬慮寬
象奕偷閒同橘隱
蟻窠榮貴等槐安樓高人在空中語
池近天從鏡裏看
幾夜闌干吟弄處微風不動月團團

借韻寄太古王先生

故人相望隔燕齊恨不雲山一夜低
別後雨蘋供采澗
老來風絮想沾泥書言社稷何時上
詩在松蘿到處題
記得避炎山後屋殘更吟伴鬼神啼

題潛山雙廟

楓木陰濃日轉廊兩公心事寄睢陽生同歲月呼兄弟
死有江淮奉帝王簡墨尚留肝膽在篆煙那敵姓名香
後來人物如公少時事難言重可傷

釣臺次韻

俞師賢

漢官威儀如舊日先生羊裘釣澤中東都名節從此始
雲臺功烈何能同寒流殘照見天末危石脫木驚秋窮
惜哉登臨迫行役負此千載桐江風

記先祖嘉議公遺事

先祖諱懸為新安監郡有
惠政卒葬于歙當歲旱禱

黃山及汪王祠而雨又建廡訪公署
及新陳塘寺以祈親壽遺跡尚存

仇自堅

歙州山水似桐鄉先子神遊歲月長
烏府落成存舊柏
黃山遺愛說甘棠名題梵宇祈親壽
文刻叢祠禱歲穰
百世圖經公論在已聞名字入循良

送潘和仲南豐巡檢

胡孟成

潘郎不見已三年
薊北行吟行輦傳
綠綬近懸都使印
畫旗先擁上江船
時平下馬還裁檄
春暖收衙自注玄

王霸莫論尊孟子辨香先為拜鄉賢

鄭待制席上同劉伯溫都事燕叔義憲史諸公

賦承天觀東軒詩

吳訥

孤客憑危正惘然江南春盡落花天
海門黑送千艘雨城郭青炊萬竈煙
燒藥金鑪猶伏火射潮鐵箭久離弦
伍員白馬今何在幾度荒臺野鹿眠

次韻程子元閨怨

自從銷瘦畏多讒懶上紅樓望翠巖
九轉織成紅錦字

幾番啼濕絳綃衫嫁時羅帶同心綰別後金釵十字絨
安得化為檣上燕春來秋去逐征帆

客錢塘有懷東山趙子常

時徵師山
鄭先生

小閣踈簾晝影移憑闌多是獨吟時夕陽關樹高低畫
殘雪江梅遠近詩潭底又聞龍劍化隴頭應怪鶴書遲
何時鄉里囂塵散來傍清流理釣絲

聞朱隱君官賜號澄節處士

汪蘊五

北郭幽偏是鶴山一軒高卧白雲關先生道出羲皇上

處士名標晉宋間尊俎風流無俗客琴書和樂足怡顏
天邊一札驚猿鶴只恐公今未得閒

次韻寄汪彥貞

汪俊德

五年一笑亂離過託跡林泉意若何花外不聞供奉曲
山中時聽采薇歌枕雲漱石塵緣少弄月吟風逸興多
稍待雨晴閒暇日會當扶策到巖阿

雜興

謝俊民

雲林得計促歸畊為圃為農了此生車戽水深連夜雨

採樵風亂隔林聲土宜菽粟勤芟草園有瓜蔬早架棚
日永華胥驚夢破不堪羣唱午雞鳴

次韻汪德輔

庸人擾擾自紛爭世事如棋乍落枰襲破臨淄烹酈子
偽遊雲夢墮陳平誅秦蹙項亦何有真楚假齊俱不成
一局始終都若是老夫端坐看輸贏

釣臺次韻

胡虛中

已幸六龍在天上勇辭諫議歸山中懦夫立志固有自

處士盜名原不同雲寒山清嚴瀨古潮生鵲沒吳天窮
回思韓歆死直諫客星始信真高風

